

INUIT ATAQATIGIIT

Inatsisartuni



Uloq 11. Juni 2018

Inatsisartut Suleriaasianni § 37 imm. 1 naapertorlugu Naalakkersuisunut apeqquq imaattoq matumuuna saqqummiuppara.

Naalakkersuisunut apeqquq:

- 1. Kunngearfiup Tuluit Nunaata EU-mit ilaasortaajunnaarneratigut ilinniarnermut atatillugu paarlaateqatigiittarneq innarlissavaa?**
 - **Taamaassappat; qanoq?**
- 2. Kunngearfiup Tuluit Nunaata EU-mit ilaasortaajunnaarneratigut innuttaasut Nunatsinneersut Kunngearfimmi Tuluit Nunaanni najugaqarnerannut imaluunniit sulinerannut pitsaanngitsumik sunniuteqassava?**
 - **Taamaassappat; qanoq?**
- 3. Naalakkersuisut pilersaaruteqarpat Kunngearfik Tuluit Nunaanni aallartitaqarfeqalernissamut?**
- 4. Naalakkersuisut qanoq iliuseqarpat Kunngearfiup Tuluit Nunaata EU-mit anineratigut tamatuma Nunatsinnut aningaasaqarnikkut pitsaanngitsumik kinguneqarsinnaanerata minnerpaaffeqarnissaa siunertaralugu?**

(Inatsisartuni ilaasortaq Sofia Geisler, Inuit Ataqatigiit)

Tunggavilersuut:

Ilisimareerparput Kunngearfiup Tuluit Nunaata EU-mit marts 2019 anineratigut tamanna Nunatsinnut aningaasaqarnikkut annertuumik sunniuteqarsinnaasoq.

Niuerfimmi tassani 500 millioner kronit sinnerlugit Nunatta annaasinnaavai, fabrikkut matuneqarsinnaapput suliffiillu annaaneqarsinnaallutik.

Nunani allani aamma ilisimaneqareerpoq nunat allamiut Tuluit Nunaannut ilinniariartut assigiinngitsunillu patsiseqartumik tassani najugaqartut Kunngearfiup Tuluit Nunaata EU-mit anineratigut sunniuteqarfigineqarnissaat. Nunatsinneersut ilinniartut imaluunniit assigiinngitsut pissutigalugit Kunngearfimmi Tuluit Nunaanni najugaqartut nunap taassuma EU-mit ilaasortaajunnaarneratigut qanoq sunnerneqarsinnaanerata pillugu Naalakkersuisut akissutissaat qilanaaralugu utaqqissavara.

Kissaatigivara apeqqutikka ullut suliffiusut qulit qaangiutinnginneranni akineqarnissaat.